

आकाशवाणी जयपुर-अजमेर

प्रादेशिक समाचार

दिनांक 14.06.2025

समय: 18.45 बजे

व नागरिक उड्डयन महानिदेशालय देश रा विमान बेड़ा मांय मौजूद 34 बोइंग 787 जहाज़ां री गहन जांच रा हुकम दीना ।

व प्रधानमंत्री कृषि सिंचाई योजना मांय “हर खेत को पानी अभियान” रा पहला दौर सारु मदद री रकम मंजूर-राज्य रा 2 लाख ऊं बत्ता किसानां ने फायदो मिलेला ।

व मेडिकल कॉलेजां मांय दाखिला सारु नीट यूजी परीक्षा 2025 रा नतीजा रो ऐलाण-हनुमानगढ़ रा महेश केसवानी पूरा देश मांय अब्बल रह्या ।

व राज्य मांय पश्चिमी विक्षोभ रा असर ऊं पांच संभागां मांय ज़ोरदार बायरो बाजण सागे बिरखा रा आसार ।

000

नागरिक उड्डयन महानिदेशालय भारत मांय उड़ान भर रह्या 34 बोइंग 787 जहाज़ां री विगतवार जांच रा हुकम दीना है । नागरिक उड्डयन मंत्री के. राम मोहन नायडू आ जाणकारी दीनी । वे बतायो के अहमदाबाद विमान हादसा रा हर पहलू री जांच करी जा रही है अर जांच री प्रक्रिया तीन महीना मांय पूरी कर ली जावेला । श्री नायडू आज नई दिल्ली मांय खबरनवीसां सागे बातचीत करता थकां कह्यो के हादसा री जांच सारु न्यारा-न्यारा हलकां रा जाणकारां री आला दर्जा री समिति बणायी जा रही है ।

नागरिक उड्डयन मंत्री बतायो के जांच ब्यूरो ने हादसा रा शिकार हवाई जहाज़ रो ब्लैक बॉक्स मिल ग्यो है । वे बतायो के हादसा री जद मांय आया लोगां री पिछाण करण अर मरण वाळां री लाशां पिरवार वाळां ने सूपण सारु डी.एन.ए. जांच करी जा रही है ।

000

प्रधानमंत्री नरेन्द्र मोदी काल साइप्रस ऊं न्यारा-न्यारा देशां रो दौरा सारु करेला । लारला बीस साल मांय भारत रा किंण ई प्रधानमंत्री रो साइप्रस रो ओ पहलो दौरा व्हेला । दौरा रा दूजा दौर मांय श्री मोदी कनाडा मांय व्हेवण वाळा जी-7 शिखर सम्मेलन मांय शिरकत करेला । ई पाछे 18 जून ने वां रो क्रोएशिया रा दौरा रो कार्यक्रम है ।

000

प्रदेश मांय चलाया जा रह्या ‘वंदे गंगा’ जल संरक्षण-जन अभियान’ रा तैत कर्या जा रह्या कामां रे ज़रिए पाणी रा स्त्रोतां ने और बेहतर बणावण, साफ-सफाई अर पाणी बचावण रो संदेश दियो जा रह्यो है ।

मुख्यमंत्री भजनलाल शर्मा आज अजमेर मांय आना सागर झील माथे श्रमदान कीनो । ई दौरान विधानसभा अध्यक्ष वासुदेव देवनानी, केन्द्रीय कृषि अर किसान कल्याण राज्यमंत्री भागीरथ चौधरी ई मुख्यमंत्री सागे हा । भरतपुर मांय अभियान रा तहत पौधा रोपण सारु ठौड़ां री पिछाण करीजी । हनुमानगढ़ ज़िला रा गोलूवाला हलका मांय नहर री सफाई करी ज्यी । झालावाड़ मांय जल संरक्षण संवाद कार्यक्रम अर पाली मांय पोस्टर होड़ राख्यी ज्यी । पाली मांय राख्यी ज्यी पोस्टर होड़ मांय शिरकत करण वाळा साफ-सफाई, पौधा रोपण अर पाणी बचावण सारु संदेश दीनो । जन स्वास्थ्य अभियांत्रिकी मंत्री कन्हैया लाल चौधरी झुंझुनूं ज़िला रा मलसीसर मांय पौधा रोप्या । ई मौके वे कह्यो के वंदे गंगा’ जल संरक्षण-जन अभियान ऊं सीख ले र सगळां ने पाणी बचावण रो संकल्प लेवणो व्हेला ।

000

प्रधानमंत्री कृषि सिंचाई योजना रा तैत जल संसाधन विभाग ने जल शक्ति मंत्रालय री ओर ऊं साढ़े सोलह करोड़ रुपया री सहायता राशि मंजूर करीजी है । ‘हर खेत को पानी अभियान रा तैत मंजूर करी ज्यी ई रकम ऊं कोटा, बूंदी अर टोंक ज़िला मांय 84 काम और तेज कर्या जावेला । जल संसाधन मंत्री सुरेश सिंह रावत बतायो के राज्य

सरकार री ओर ऊं ई अभियान रा तैत कर्या जावण वाळा कामां बाबत करीब 11 करोड़ रुपया और जोड़्या जावेला। वे बतायो के इण ऊं पाणत रा सुबीता बधाया जावेला। रावत कह्यो के इण ऊं 2 लाख 16 हजार ऊं बत्ता किसानां ने फायदो मिलेला अर 'वंदे गंगा' जल संरक्षण-जन अभियान रा तैत कराया जा रह्या काम ई तेजी ऊं पूरा कर्या जा सकेला। जल संसाधन मंत्री आज चूरु जिला रा तारा नगर मांय 312 करोड़ रुपया रा खर्च ऊं पूरा करी ज्या नहरां रा विकास रा काम जनता ने संपूया। ई मौके राखी ज्या किसान सम्मेलन मांय भाजपा रा नेता राजेन्द्र राठौड़ ई शिरकत कीनी। वे कह्यो के आं कामां ऊं हलका रा किसानां ने पाणत सारु जरूरी तादाद मांय पाणी मिल सकेला।

000

राष्ट्रीय परीक्षा एजेंसी-एनटीए मेडिकल कॉलेजां मांय दाखिला सारु लीरीजी नीट यूजी 2025 परीक्षा रा नतीजा रो ऐलाण कर दीनो है। नतीजा रे मुजब हनुमानगढ़ जिला मांय नोहर रा डबली राठान गांव रा रेहवासी महेश केसवानी पूरा देश मांय अव्वल रह्या। ओ इम्तिहान पहली बार देवण वाळा महेश 720 मांय ऊं 686 नम्बर हासिल कीना। 4 मई ने लीरीजी नीट-यूजी परीक्षा मांय 22 लाख ऊं बत्ता विद्यार्थी शामिल ह्या हा। प्री-डीएलएड 2025 परीक्षा रा नतीजा रो ई ऐलाण कर दियो ज्यो है। शिक्षामंत्री मदन दिलावर आज कोटा ऊं नतीजो जारी कीनो। वर्धमान महावीर खुला विश्वविद्यालय री ओर ऊं एक जून ने आ परीक्षा लीरीजी ही।

000

राजस्थान राज्य अधीनस्थ सेवाएं मुख्य परीक्षा 2024 रा एडमिट कार्ड आयोग री वेबसाइट माथे अपलोड कर दिया ज्या है। राजस्थान लोक सेवा आयोग रा सचिव रामनिवास मेहता बतायो के 1 हजार 96 ओहदां माथे भर्ती सारु आर.ए.एस. मुख्य परीक्षा 17 अर 18 जून ने चार पारियां मांय ली जावेला।

000

11वां अंतरराष्ट्रीय योग दिवस रा सिलसिला मांय आज दिल्ली मांय "योग कनेक्ट 2025" सम्मेलन राखी ज्यो। सम्मेलन मांय देश-परदेश रा योग गुरु अर नीति बणावण वाळा शिरकत कीनी। विश्व स्तर रा ई सम्मेलन मांय केन्द्रीय संस्कृति अर पर्यटन मंत्री गजेन्द्र सिंह शेखावत कह्यो के पूरी दुनिया मांय योग रो प्रचार ह्यो है अर भारत री आ अनमोल विरासत देश-दुनिया ने जोड़्या है।

अंतर्राष्ट्रीय योग दिवस रा सिलसिला मांय आकाशवाणी जयपुर रा क्षेत्रीय समाचार एकांश री ओर ऊं चलायी जा रही संदेश श्रृंखला मांय आज पेश है सीकर रा आयुर्वेद चिकित्सा अधिकारी अर योग री सिखावण देवण वाळी सुमन भांभू रो संदेश। वां रो कहवणो है के योग दिवस रा ई दफा रा मुद्दा सागे म्हां पूरी दुनिया रा बेहतर स्वास्थ्य री कामना करां हां।

000

पश्चिमी विक्षोभ अर प्रदेश रा उत्तराद-आतूणी हलकां मांय परिसंचरण तंत्र रा असर ने ध्यान राखता थकां मौसम विभाग आज बारिश व्हेवण सारु चेतायो है। जोधपुर अर बीकानेर संभाग सारु येलो अर जयपुर, कोटा अर उदयपुर संभाग सारु ऑरेंज अलर्ट जारी करी ज्यो है। राज्य मांय आंधी-बारिश चालता रेहवण अर 20 जून ऊं इण मांय और बधोतरी रा आसार है। इण ऊं पारो 3 ऊं 4 डिग्री सेल्सियस ताई उत्तरण सागे लू ऊं आराम मिलण री संभावना है। ई बीचे आज बांसवाड़ा, हनुमानगढ़, झालावाड़, बारां अर श्रीगंगानगर समेत केई ठोड़ां बादळां री गाज सागे बिरखा व्ही। सादुलशहर रा मोरजंडा मांय ओळा पड़्या। ई बीचे हनुमानगढ़ अर चूरु मांय आज जबरदस्त गर्मी रो असर रह्यो। म्हाणा चूरु खबरनवीस बतायो के तेज गर्मी ऊं परेशान लोग बेसब्री ऊं चौमासा री बिरखा री बाट देख रह्या है।

000

देश री हिफाजत मांय अगाड़ी रेहवण वाळा सीमा सुरक्षा बल रा जवान अब नुवी वर्दी मांय निजर आ रह्या है। आ वर्दी सोहवणी निजर आवण सागे आरामदायक ई है। बी.एस.एफ.-नॉर्थ रा डीआईजी योगेंद्र सिंह राठौड़ बतायो के नुवी वर्दी बी.एस.एफ. रा जवान ई डिजाइन कीनी है।

000